

«Angal» la medaglia da bronz

Gion Nutegn Stgier/FMR

Treis gruppas grischunas èn stadas dalla parteida aint igl final dalla categoria D. Persvadia on ellas gio aint igl quart final e mez final ed alloura er aint igl final. Tratg igl final on er dus tiradours ed ena tiradoura cun fermas rieischs tar Surses.

A Winterthur ò gia li igl final svizzer digl teir da gruppas. Sa qualifitgeidas per chel final naziunal èn 64 gruppas, cun 320 tiradours e tiradouras da 16 cantuns. Tranter las 64 gruppas qualifitgeidas er set gruppas grischunas, tantas scu darar siva digl 1950, igl onn tg'igl final è nia introduia. Igl 1997 on schizont die-sch gruppas digl Grischun contanschia igl final tgi veva li da lez taimp anc ad Olten. Ad Olten èn alloura er gio stadas gruppas da Surses. Gist treis gedas ena gruppa dall'Uniun da teir Tinizong, igl 1970, 1974 e 1977 ed igl 1974 er la gruppa dall'Uniun da teir Sur. 40 onns ègl alloura cuzzo anfignen tg'ena gruppa surmirana ò fatg puspe igl zap aint igl final. Igl 2017 è chegl reuschia alla gruppa d'Alvagni. Cun esser tot igls tiradours da chel quintet catscheders on els renunztgia agl final svizzer, avend li chel gist igl amprem de da tga-tscha, scu igl final 2022 digl reminent er.

Mamma e feagl cun la gruppa da Givaulta

La gruppa da Givaulta è sa qualifitgeida danovamaintg pigl final naziunal ainten la categoria D (arma 57/03) e chegl an moda suverana. Igl quatter tiradours e la tiradoura on gia ena fegnameira e chella è stada da defender igl tetel da campiun svizzer. Gio igl 2019 ed er avant en onn è la gruppa da Givaulta davantada campiunessa svizra. Sonda pasada ègl alloura betg tanschia per chel tetel cun treir la gruppa, per las sias relaziuns, schlets resultats gist aint igl final. Aint igl quart final e mez final a Winterthur ò igl quintet anc tratg 710 e 707 puncts. Aint igl final alloura angal ple 697 puncts, schi pac puncts scu an mai. Cun la gruppa dalla Tumliastga on tratg er Silvia Plaz e Kevin Plaz. Mamma e feagl on ena ferma relaziun cun Savognin, igl om e bab Franz Josef Plaz dereiva da Savognin. Silvia Plaz totga an Svizra tar egna dallas miglras tiradouras sen la distanza da 300 meters. Er a Winterthur ò ella tratg precis cun passas da 146/144/143 puncts. Kevin Plaz ò tratg aint igl quart final ena passa da 137 puncts, persiva egna da 145 puncts aint igl mez final ed aint igl final decisiv alloura angal ena passa da 135



Silvia Plaz e Kevin Plaz, mamma e feagl dattan en tgit sen la tavla digls resultats.



Paran d'esser cuntaints cun lour resultats. (da dretg) Rafael Spinas ed Alessandro Rota, igls dus tiradours dalla gruppa Bregaglia.

Fotos Gion Nutegn Stgier

puncts, per el en resultat pi mediocr. Tuttegna ègl tanschia per la gruppa da Givaulta per en plaz da podest cun far la medaglia da bronz.

Bregaglia cun Rafael Spinas aint igl final

A Winterthur on tratg alla fegn las seis pi fermas gruppas igl final dalla categoria D. Daspersas las gruppas da Tumegl e Givaulta è stada cun Bregaglia er anc ena terza gruppa

grischuna aint igl final. Commember dalla gruppa da Bregaglia è cun Rafael Spinas er en triadour cun rieischs tar Surses. El dereiva da Sur, d'ena famiglia da ferms tiradours ed el sez è er en tiradour fido. Rafael Spinas stat cun sia famiglia a Vicosoprano ed è ena ferma pitga dalla gruppa Bregaglia. Alla fegn ègl betg tanschia agl quintet da neir segl podest a Winterthur cun terminar igl final cun plaz tschintg.